

**Naalakkersuisut inuit tarnimikkut nappaatillit amerlanerit aamma ajuutillit
ilinniakkaminnik aallarteriikkaminnik naammassinninnissaannut
suliniuteqarnissaannik peqquneqassasut Inatsisartut aalajangigassaannik siunnersuut.
Tamanna ilaatigut pisinnaavoq inuit peqannginnerusinnaanerat periarfissiissutigalugu
amma ilinniarnerup sivisussusia akuereriikkamit sivitsorlugu.**

Inatsisartunut ilaasortaq, Paneeraq Olsen, Naleqqameersup saqqummiussaa

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

siunnersuutip aappassaaneerneqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Doris J. Jensen, Siumut, siulittaasoq
 Inatsisartunut ilaasortaq Nivi Olsen, Demokraatit, siulittaasup tullia
 Inatsisartunut ilaasortaq Mala Høy Kúko, Siumut
 Inatsisartunut ilaasortaq Mariia Simonsen, Inuit Ataqatigiit
 Inatsisartunut ilaasortaq Eqaluk Høegh, Inuit Ataqatigiit

UPA2023-mi ulloq 25. april siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Siunnersummi matumani inuit tarnimikkut nappaatillit amerlanerusut ilinniakkamik ingerlataqarlutik peqataasinnaanerat aamma naammassinnissinnaanerat sulissutigineqarnissaanik Naalakkersuisut peqquneqarput. Taamaalilluni inuit tarnimikkut nappaatillit immikkut pisariaqartissinnaasaat pillugit ilinniartitaanermik ingerlatseriaaseq naleqqussaavigineqarnissaanut suliniutinik aallartitsisoqarnissaanik Naalakkersuisut siunnersummi matumani peqquneqassapput. Tassunga atatillugu akuerisaasumik peqanngiffeqarsinnaanermut aammalu ilinniarnerup ingerlanerani piffissaliussatut sinaakkusiusap sivitsorneqarnissaanut akuersinissamut periarfissaqalernissaq siunnersuuteqartup innersuussutigaa.

Inuit tarnimikkut nappaatillit ilinniarnerminni immikkut pisariaqartitaannik naleqqussaaviginninnissap qulakkeerneqarnissaai siunnersummi siunertaavoq. Tunngaviusumik siunertarineqartoq tassaavoq inuit tarnimikkut nappaatillit, ullumikkut

nappaateqarnertik peqqutigalugu ilinniakkamik naammassinninnissaminnik
 unammillernartunik nalaataqartartut, ilinniakkaminnik naammassinninnissaannut
 periarfissinneqarnissaat.

2. Siunnersuutip aningaasatigut kingunerisassai

Inatsisartut suleriaasianni allassimasoq naapertorlugu siunnersuutip
 piviusunngortinnejarnissaanut AC-fuldmægtigip ukiunut marlunnut aningaasarsiaanik 1 mio.
 kr.-inik naleqassasoq ataatsimiititaliamit maluginiarneqarpoq.

3. Siunnersuutip Inatsisartuni siullermeerneqarnera

Inersuarmi siullermeerinninnermi siunnersuutip pingaaruteqassusaa pillugu
 isumaqatigiiffiulluarpoq. Inuit tarnimikkut nappaatillit ilinniagaqarnissaminnut
 periarfissaqalernissaat pillugu Inatsisartut qulakkeerinnejataanissaat amerlanerussutillit
 kissaatigaat. Tassunga atatillugu oqaatigineqarpoq, inunnut tarnimikkut nappaatilinnut kiisalu
 ilinniarsimasunut qanigisaasunullu eqqortumik ilitsersuisarnerup qulakkeerniarneqarnera
 aamma unammillernartoqartoq. Tamatuma saniatigut inunnut tarnimikkut nappaatilinnut
 ilinniartitaanerup iluani ikorsiissutaasinnaasut pioreersut pillugit paasissutissat amigartut
 eqqaaneqarpoq. Taamatuttaaq inuit ilinniarsimasut piginnaasaannik ineriaartortitsineq aammalu
 meeqqat atuarfiannit ilinniaqqittarneq pingaarutilittut eqqartorneqarput.

4. Sassartitsinerit

Kattuffinninngaannit, suliffeqarfinniit peqatigiiffinniillu tulliuttutigut allaqqasunit
 ataatsimiititaliamut sassartitsisoqarnikuovoq:

- Sugisaq
- Nuna tamakkerlugu peqatigiiffik Autisme - Kalaallit Nunaat
- ADHD Kalaallit Nunaat
- Nuna tamakkerlugu ilitsersuisarfik

Peqatigiiffit qulaani allassimasut sassartitsinissamut ataatsimiititaliamit
 aggersarneqarnikuupput, ilinniakkamik aallartitsinissaq naammassinninnissarlu
 eqqarsaatigalugit taakkunani ilaasortat unammillernartut aalajangersimasut misigisarsimasaat
 pillugit paasisanik pissarsinissaq siunertaralugu, kiisalu aaqqiissutissat sorliit peqatigiiffinit
 tikkussiffingeqarsinnaanersut.

Ilinniartut tarnimikkut nappaatillit misigisartagaat pillugit ilitsersuisarfimmit
 pisariaqartissorineqartut pillugit ilisimasanik pissarsinissaq siunertaralugu Nuna tamakkerlugu
 ilitsersuisarfik aggersarneqarpoq, kiisalu ilitsersuisarfimmit taakkununnga suut
 neqeroorutaasarnersut paasiniarniarlugu.

5. Ataatsimiititaliap siunnersuummik suliarinninnera

5.1 Inuit innarluutillit pillugit isumaqatigiissut

Inuit tarnimikkut nappaatillit Inuit Innarluutillit pillugit Naalagaaffiit Peqatigiit
 isumaqatigiissutaanni pisinnaatitaaffinnut ilaapput. Tamanna isumaqatigiissummi siunertat
 pillugit artikelimi naqissuserneqarpoq (artikeli 1)

” Inuit ataavartumik timikkut, tarnikkut eqgarsartaatsikkullu aammalu timikkut arlaatigut pisinnaasakinnerulersimasut aporfissat assigiinngitsut suleqatigalugit allat assigalugit inuiaqatigiinni tamakkiisumik sunniuteqartumillu peqataanissaminnut peqataasinnaajunnaartut.”

Isumaqtigiisummi artikeli 24-mi ilinniagaqalernissamut pisinnaatitaaffik pineqarpoq, tassanilu inuit innarluutillit ilinniarfinnut ilaatinneqartarnissaannik qulakteerinninnissamut Kalaallit Nunaat pisussaaffilerneqarluni. Taamaalillutik inuit innarluutillit inuit allat assigalugit ilinniagaqarnissaminnut periarfissaqalissapput. Tamatumunnga ilaatigut ilaavoq ilinniarfik inuit innarluutillit pisariaqartissinnaasaannut naleqqussaasassasoq. Tamatumunngattaaq ilaavoq ataasiakkaanut ikuutissanik qulakteerinninnissaq.

5.2 Inuit innarluutillit ilinniarfiillu pillugit kisitsisit atorlugit nalunaarsuutit

2020-mi Tilioq aamma Ilisimatusarfik misissuinerup takutippaa innuttaasut, timimikkut piginnaasakillinikuunngitsut, affaasa missai ilinniagaqartartut, taamaallaallu inuit innarluutillit inuit tallimaagaangamik marluk missai kisimik ilinniagaqartartut¹. Misissuinermi inuit innarluutillit eqimattattut ataatsimoortillugit pineqarput. Inuit tarnimikkut innarluutillit imaluunniit tarnikkut nappaatit qanoq ajortignerat pillugit kisitsisit atorlugit nalunaarsuummik assingusumik peqanngilaq.

5.3 Ilinniartitaaneq pillugu inatsit

Inatsit inunnut tarnimikkut nappaatilinnut immikkut pisariaqartitalinnut ilinniagaqarnermullu tunngassuteqartoq, inuit innarluutillit tapersorsorneqarnissaat pillugu inatsimmut kiisalu ilinniartitaanermut immikkut ittumik inatsisinut nalunaarutinullu tassunga atasunut naleqqussagaavoq.

5.3.1 Inuit innarluutillit tapersorsorneqarnissaat pillugu inatsit

inuit innarluutillit tapersorsorneqarnissaat pillugu inatsit ilaatigut ima siunertaqarpoq, ataasiakkat ilinniagaqarnissaminnut suliffissaqarnissaminnullu periarfissaannik siuarsaataasussatut. Inuit innarluutillit tapersorsorneqarnissaat pillugu inatsimmi siunertat pillugit paragraffimi ima allassimavoq, inatsimmi siunertarineqartut ilaatigut una ilagigaat: *inuup innarluutillip ineriartorsinnaanissaanik aamma piginnaasai naapertorlugit nammineq periarfissaqarfiinik atorluasinjaanernik siuarsaaneq, matumanit inummut ataasiakkaamut tamanna periarfissaappat, ilinniagaqarnermik periarfissaq ilanngullugu, aammalu ataasiakkat ilinniarnissaannut sulisinnaanissaannullu periarfissat siuarsarnissaat.*

Inuit innarluutillit tapersorsorneqarnissaat pillugu Namminersorlutik Oqartussat nalunaarutaanni ikuutissat allatorneqarput. Tassanittaq inuk innarluutilik ilinniarnissaminut periarfissillugu ikuutissaq ilaavoq. Tamanna taamaallaat atutissaaq ikuutissaq inatsimmi allami soorlu assersuutigalugu ilinniagaqarnermут tunngasumi tapersorsorneqarnissamut periarfissatut ilaanngippat.

5.3.2 Inuussutissarsiornermut ilinniagaqarfiiit

Inuussutissarsiutinut ilinniarnernut suliassaqarfimmi inuussutissarsiutinik ilinniarfinni soraarummeertarnerit pillugit Namminersorlutik Oqartussat nalunaarutaat naapertorlugu

¹ Holdninger til Handicap, Tilioq aamma Ilisimatusarfik, 2020

<https://tilioq.gl/media/chyd2lsh/tilioq-holdninger-til-handicap-nov20-web.pdf>

soraarummeernissamut piumasaqaatit aalajangersarneqartut saneqqunneqarsinnaapput, ilaatigut innarluuteqarneq upernarsarneqartoq tunngavigalugu.

5.3.3 GUX

Ilinniarnertuunngorniarfiit iluanni ilinniartut innarluutillit immikkut pisariaqartitaat naapertorlugit misilitsinngitsoortinnejarsinnaapput. Ilinniartoq inuttut innarluutini peqqutigalugu ilinniartitsisummi ataatsimi arlalinniluunniit atuartitsinermut peqataasinjaanngikkuni, ilinniartoq atuartitsinerup ilaani peqataanngiffeqarsinnaavoq. Ilinniarfimmi rektorip suliamik sukumiisumik nalilersuereerneratigut peqataanngiffeqartoqarsinnaavoq². Tamatuma saniatigut GUX-imi ilinniartut pisariaqartitsisut perorsaanikkut tapersiissutaasumik immikkut aaqqissuussinernik neqeroorfigineqarsinnaapput. Aaqqissuussinerit ilinniartumut periarfissiissutigineqassapput, tamanna pillugu immikkut ilisimasallit oqaaseqareernerisa kingorna ilinniartup pisariaqartitaanik, pisariaqartitat pineqartut ikorsiivigineqarsinnaanerannik periarfissanut sanilliussilluni, rektorip tigussaasumik nalileereerneratigut³.

5.4 Naalakkersuisut nassuaataat iliuusissatullu pilersaarutaat

Naalagaaffiit Peqatigiit isumaqatigiissutaata Kalaallit Nunaannit eqquutsinnejarnissaal pillugu nassuaammik suliaqassasut, kiisalu malitsigisaanik Inuit Innarluutillit pillugit Naalagaaffiit Peqatigiit isumaqatigiissutaata eqquutsinnejarnissaanut qulakeerinnittussamik iliuusissatut pilersaarummik suliaqassasut 2019-imi upernaakkut ataatsimiinnermi Naalakkersuisut Inatsisartunit peqquneqarput. Nassuaat taanna 2022-mi saqqummersinneqarpoq. Iliuusissatut pilersaarut suli pisortatigoortumik saqqummiunneqanngilaq. Taamaattorli siunnersuutip matumani pineqartup siullermearneqarnerani iliuusissatut pilersaarutissaq Ilinniartitaanermut, Kultureqarnermut, Ilageeqarnermut Ilisimatusarnermullu Naalakkersuisumit innersuussutigineqarpoq.

Inuuusuttunut ilinniagaqarfinni aammalu inunnut tarnimikkut nappaatilinnut ingerlaqqiffiusumik ilinniagaqarfinni suliniutaasut ajornartorsiutaasullu pillugit nassuaammi ukua qulaajaavagineqarput:

- Meeqnanut inuuusuttunullu meeqqat atuarfianni uninnikunut nalinginnaasumillu atugassarititaasut atorlugit inuuusuttunut ilinniakkamik naammassinnissinnaanngitsunut neqeroorutit amigaataapput.
- GUX-S aaqqissuussaq aqqutigalugu immikkut piareersaaffigisamik ilinniarnertuunngorniarfimmi periarfissaq.
- Immikkut immikkoortortaq tarnikkut suliassaqarfiup iluani ilinniarnertuunngorniarfinnut tamanut kiisalu ilinniagaqarfinnut allanut tapersersuisuusarpoq. Immikkut immikkoortortaq ilinniartunut atuartunullu immikkut ittumik pisariaqartitalinnut ikuinissamik, tapersersuinissamik, aqqutissiuinissamik siunnersuinissamillu neqerooruteqartarpoq.

² Ilinniarnertuunngorniarfinni ilinniarnermut ileqqorissaarnermullu malittarisassat pillugit Namminersorlutik Oqartussat nalunaarutaat nr. 10, 23. juli 2012-imeersoq, §6

³ Ilinniarnertuunngorniarneq pillugu Inatsisartut inatsisaat nr. 13, 22. november 2011-meersoq, §43

- Suliffinnik sungiusarfissaniq nassaarniarneq ilinniartunut ajornakusoortarpoq. Tamanna inunnut timimikkut tarnikkullu innarluutilinnut unammillernarerujussuusarpoq.
- Sinerissami periarfissat Nuummut sanilliullugit allaanerusartut angajoqqaat maluginiartarpaat. Sinerissami piffit ilaanni inuuusuttu ilinniaqqinnissaminut periarfissaqannginnerarlugit ilisimatinneqartarput. Akerlianilli Nuummi inuuusuttu innarluutillit ilinniagaqarnissaminut tapersorsorneqartarlutik.
- Kalaallit Nunaanni ilinniagaqarnissamut periarfissat naammannginneri peqqutaallutik inuit innarluutillit Danmarkimut ilinniariartortariaqarlutik misigisarput.
- Inunnut innarluutilinnut ilinniagaqarniartunut tapersersuinissamut periarfissat nalinginnaasumik amigaataapput. Soorlu assersuutigalugu tapersersortit aammalu ikuutissat akuersissutigineqarnissaat tunniunneqarnissaallu inunnit sivisuumik utaqqineqartarput.

Inunnut innarluutilinnut suliassaqarfiup iluani sulisunik ilinniagaqartitsinissamut, ilinniagaqqinnissamut pikkorissaasarnissamullu nuna tamakkerlugu periusissiamik iliuusissatullu pilersaarummik suliaqaaqqullugit Naalakkersuisut peqquneqassasut 2021-mi ukiaanerani ataatsimiinnermi Inatsisartunit akuersissutigineqarpoq. Susassaqarfiup iluani sulisut akornanni ilisimasat piginnaasallu qaffasinnerulernissaannik iliuusissatut pilersaarut qulakkeerinnituussaaq. Periusissiatut iliuusissatullu pilersaarut aalajangiiffigisassatut siunnersuut naapertorlugu UKA2022-mi kingusinnerpaamik saqqummiunneqartussaagaluarpoq. Tamannali suli pisortatigoortumik saqqummiunneqanngilaq.

6. Ataatsimiititaliap oqaaseqaatai inassuteqaataalu

Inuit tarnikkut nappaatillit ilinniagaqarnissaminut assigiimmik periarfissaqarnissaat ataatsimiititaliamit pingaartilluinnarneqarpoq. Naak inuit innarluutillit pillugit isumaqatigiissummut ilanguttoqaraluartoq inuit innarluutillit ilinnialernissaat eqqarsaatigalugu suli unammillernartut annertupput. Tamanna imaananaangitsorujussuartut ataatsimiititaliamit isigineqarpoq. Taamaattumillu aamma Inuit innarluutillit pillugit isumaqatigiissutip malinnejarnissaa pillugu Iliuusissatut pilersaarutip suliarineqarnissaa kinguaattooqqasoq ajuusaarnarpoq. Ukoq manna Ukiaanerani ataatsimiinnermi Inatsisartunut saqqummiunneqarnissaa ataatsimiititaliamit qilanaarineqarpoq.

Inunnut innarluutilinnut suliassaqarfiup iluani sulisunik ilinniagaqartitsinissamut, ilinniagaqqinnissamut pikkorissaasarnissamullu nuna tamakkerlugu periusissiamik iliuusissatullu pilersaarummik Inatsisartunut suli saqqummiussisoqanngitsoq ataatsimiititaliamit upuarneqarpoq, naak tamanna 2022-mi ukiakkut ataatsimiinnermi saqqummiunneqarsimasussaagaluartoq. Nunatsinni innuttaasut allat assigalugit inuit tarnimikkut nappaatillit ilinniarnissaminut periarfissinneqassappata, taava sulisut ilinniarsimasut pisariaqartinneqassapput. Ilinniartitsut immikkut ilisimasallit, isumaginninnermi perorsaasut ilinniarsimasut inunnik ataasiakkaanik tapersersuisinnaasut pisariaqartinneqarput. Inuit innarluutillit ingammik inuit tarnimikkut nappaatillit ilinniartitaanerup iluani paasilluarsinnaaneqanngitsutut misigisarput. Sulisut ilinniarsimasut eqortumik piginnaaneqarneritigut tamanna qulakkeerinnissamut ikuutaassaaq.

Tamanna tunngavigalugu inunnut innarluutilinnut suliassaqarfíup iluani sulisunik ilinniagaqartitsinissamut, ilinniagaqaqqinnissamut pikkorissaasarnissamullu nuna tamakkerlugu periusissiamik iliuusissatullu pilersaarummik Naalakkersuisut suliaqarnerat sumut killinnersoq Naalakkersuisut akissuteqaammi nassuaateqarfigissagaat ataatsimiititaliamit kaammattutigineqarpoq. Tullertullu siunnersuutip matuma piviusunngortinneqarnerani siunnersummi Naalakkersuisunut suliakkiutigineqartutuut sulisunik ilinniarsimasunik paasitsinsiaaneq pikkorissaanerlu suliamut ilanngunneqassanersut isumaliutigineqassanersoq ataatsimiititaliamit kaammattutigineqarpoq.

Sugisaq, Nuna tamakkerlugu Peqatigiiffik Autisme – Kalaallit Nunaat, ADHD Kalaallit Nunaat aamma Nuna Tamakkerlugu Ilitsersuisarfik ilisimasaminnik ataatsimiititaliamut avitseqatiginninnerannut ataatsimiititaliaq qutsavignippooq. Saqqummiussinerni ataatsimoorfingeqartoq ilaatigut tassaavoq, tarnikkut nappaateqarnerup ilinniartumut qanoq sunniuteqartarneranik paasissutissiisoqartarnissaa pisariaqartinneqartoq, kiisalu ataasiakkaat immikkut pisariaqartitaannut atuartisinerup naleqqussarneqartarnissaanut periarfissanik pisariaqartitsisoqartoq. Tassani aamma siunnersuutigineqartoq tassaavoq ilinniartut tarnimikkut nappaatillit piffisat ilaanni inuppassuit akornanniissinnaangnitsut, qarasaasiatigut atuartinneqartarnissaannut periarfissiinissaq. Siunnersuutip piviusunngortinnissaanut suleriaqqinnermut peqatigiiffiit kattuffiillu attuumassuteqarsinnaasut ilaatinneqarnissaannik ataatsimiititaliaq Naalakkersuisunut kaammattuuteqarpoq.

Tarnip pissusaanut immikkoortortami sulisussaqarniarnikkut, sukumiisumik misissuinermi nappaatinillu suussusersiniarnermi unammillernartut nalaattakkat inuit tarnimikkut nappaatillit ilinniagaqarnissamut periarfissaannut pitsaangnitsumik sunniuteqartarput. Siunnersuutip uuma piviusunngortinniarnerani, kiisalu iliuusissatut pilersaarutinik siuliani taaneqareersunik suliaqarniarnermi, inuit tarnimikkut nappaatillit eqqortumik tapersorsorneqarlutillu ikiorneqarnissaannik, aamma tarnip pissusaanut immikkoortortami, qanoq qulakkeerinnitoqarniarnersoq pillugu ilanngussisoqassasoq ataatsimiititaliamit kaammattutigineqarpoq. Taamatuttaaq Peqqinnissaqarfimmi (UPA2023/30/78/89) tarnip pissusaanut immikkoortortami ineriartortitsinissamut pilersaarutip suliarineqarneranut atatillugu Naalakkersuisut immikkoortortat akimorlugit, assersuutigalugu tarnip pissusaanut immikkoortortap ilinniartitaanermullu immikkoortortap akornanni, ataqtigiiisaarinermut ukkatarinnissasut kaammattutigineqarpoq.

Taamatut oqaaseqaateqarluni kaammattuuteqarlunilu siunnersuut ataatsimiititaliap isumaqatigiittup akuerisassanngortippaa.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.

Doris Jakobsen Jensen
Siulittaasoq

Nivi Olsen
Siulittaasup tullia

Eqaluk Høegh

Mala Høy Kúko

Mariia Simonsen